

# MANIFESTU

4CaniperStrada est unu laboratòriu de ideas, unu grupu de persones abertu e sensibile. Gente interessada in manera ativa a su mundu de sa comunicatzione, chi creet in s'arte de s'espressione e de sa sensibilizatzione tràmite sas ainas àudio-visivas. Si proponet de aprontare progetos artìsticos e formativos pro los difùndere in tzentros culturales, sotziales e didàticos in su territòriu regionale, natzionale e internatzionale.

Punnamus a sa difusione e a sa produtzione tzinematogràfica indipendente (film curtzos, documentàrios e film longos, video-giornalismu e organizatzione de rassignas àudio-visuales de autore) e sa fotografia (dae sos cursos didàticos a s'espositzione de òperas, finas a su foto-giornalismu), colende nche dae sa literadura e dae sas espressiones musicales.

Sunt custas sas ainas printzipales de comunicatzione de 4CaniperStrada chi cun su traballu issoro cherent contribuire a sa realizatzione, in Sardigna, de unu laboratòriu de ideas mannu e de òmines, chi siat su ponte intre sa creatividade artìstica e s'esigèntzia de un'inchesta sotziale cuncreta, indipendente ma aberta a su Mundu.

S'Assòtziu si proponet de operare in favore de sa produtzione, de sa difusione, de sa valorizatzione culturale e sotziale de su limbàgiu àudio-visivu, dende cara a sas formas espressivas connotas comente "liberas, indipendentes, isperimentales, de autore, sotziales, documentàrias", chi siant ammaniadas in àmbitu regionale, natzionale o internatzionale.

S'Assòtziu s'impignat a promovere, a aprontare, a difùndere - fintzas in cuncursu cun àteros sugetos - progetos produtivos, formativos e divulgativos che ingendrent interessu conca a una cussèntzia crítica, sa documentatzione de sa realidade e sos temas sotziales, s'isperimentatzione artìstica e s'indipendèntzia in sa chirca de cuntenutos, recuperende fintzas sa funtzione sotziale de su mèdiu àudio-visivu pro su megioru e pro sa crèschida culturale, siat individuale e siat colletiva.